

Yang Menyebut, Yang Merebut dan Yang Tidak Takut

Azhar Ibrahim Alwee

Peristiwa pembakaran beberapa gereja adalah rentetan daripada sesekian lama berlangsungnya ketaksuban dan keangkuhan keagamaan yang memuncak dalam konteks Malaysia.

Semenjak itu, sikap eksklusivisme beragama, idea parokial etnik-agama, teologi mundur dan percaturan pengaruh agama yang dipolitikkan, telah termanja, menjadi lemak dan dibiarkan berdenyut sehingga membengkak kini. Pembengkakan yang membusuk kalau berdarah adalah musibah paling dingerikan.

Pada masa yang sama kita perhatikan birokrasi agama, semenjak era dakwah, semakin galak dan terkadang berlagak sebagai gerombalan penguasa yang tak segan-segan bertabiat *gangster*, dan berteriak menyerang dan menggugat, sehingga penguasa politik dan golongan eksekutif pula yang seolah-olah takut kepada mereka.

Bantahan mereka, dengan gugatan dan cemuhan makin kuat, semuanya atas nama mempertahankan Islam. Apakah yang mahu mereka pertahankan kini?

Tidak lain ialah perkara yang selama ini amat meresah dan memarahkan mereka, yakni perkataan “Allah” digunakan oleh penganut Kristian di Malaysia, termasuk penyampaian Khabar Gembira (*Gospel*) dalam Bahasa Melayu.

Tengkarah ini memperlihatkan kes keangkuhan dan kefahaman agama yang paling dangkal dan ungal, khasnya dalam lembaran pemikiran Melayu di era moden ini.

Dalam pemahaman ramai di kalangan sesetengah penganut Melayu Islam di Malaysia, perkataan “Allah” adalah khas dalam Islam. Kalimah ini hanya boleh digunakan oleh orang-orang Islam dan sekiranya digunakan oleh orang-orang bukan Islam ianya bererti mencemarkan nama Allah.

Malah ditakuti kalau orang Kristian menggunakannya maka ianya akan membuat orang Melayu Islam terkeliru dan mungkin akhirnya terperangkap dalam diayah dan dakwah Kristian.

Alasan kedua ini adalah paling tidak munasabah, malah memperlihatkan kebebalan pemikiran yang luarbiasa.

Pertama, dalam ajaran Islam yang bersumber dari al-Qur’an dan Hadith, dengan paling jelas, tidak pernah menyebut apa-apapun untuk melarang mereka yang bukan Islam

daripada menyebut nama Allah, jauh sekali menyeru Muslim untuk pergi memantau dan membanteras mana-mana orang bukan Islam daripada menyebut nama Allah.

Kedua, kalau orang Melayu Islam mudah sangat terkeliru pada nama “Allah” yang tertera dalam Perjanjian Baru, ataupun dalam mana-mana penulisan Kristian, maka itu adalah persoalan kefahaman yang paling asas yang anak-anak sekolah rendah sudah seharusnya beres mengetahuinya. Maka yang tidak faham itu, di kalangan Muslim, maka harus ditubikan latihan kefahamannya, tanpa pula menidakkan orang lain menyebut nama Allah.

Sekian lama, semenjak berdekad dulu, kita dihantui dan dipukau oleh dukun-dukun saleh yang asyik menawarkan idea bahawa gerakan Kristian terus menyusup masuk untuk mengkristiankan Melayu. Sejak dari Ahmad Deedat dan gerombolan anti-Kristian yang tak sudah-sudah gerun pada Kristianisasi terhadap Muslim/Melayu, maka persoalan nama Allah digunakan dalam ajaran Kristian tempatan terus ditakuti dan ini menjadi penambah nyala prasangka dan cemuhan.

Orang Melayu sudah melalui lima ratus tahun proses pengislaman, dan agama ini boleh dikatakan mantap dan mendarah daging, dan ini tentunya agak sukar dinafikan. Dalam konteks ini, apabila dikatakan kita terdedah dengan gerakan Kristianisasi adalah lebih dari ilusi dan fantasi, yang digalakkan oleh prejudis dan ketakutan yang tak berasas.

Kalau Melayu mudah sangat tergugat, ini bukan kerana Kristian menggunakan nama Allah. Ianya disebabkan kerapuhan dalam kepercayaan mereka sendiri yang mungkin disebabkan, antara lain (a) pembelajaran dan pengajaran agama yang terlalu teknis sehingga tidak menyuntik ruh agama yang mantap; (b) krisis spritual yang dialami oleh seseorang itu; (c) pendedahan pada alternatif yang dirasakan sesuai bagi diri seseorang itu; (d) pemilihan pribadi, dan lain lain lagi

Makanya, mengaitkan sebutan “Allah” yang digunakan penganut Kristian yang kelak akan merosakkan akidah adalah ketakutan yang mencirikan minda kalut yang pendek akalunya yang berdegil dengan ketaksuban. Tambah lagi karut yang dijajakan oleh pemimpin agama tertentu, yang tergamak mengatakan “Allah” itu hanya milik orang Islam. Nas yang mereka rujuk tidak lain ialah lembaran kejahilan mereka sendiri.

Soalnya sekarang, rapuh sangatkah kepercayaan Melayu sehingga kalau nama Allah digunakan oleh Kristian maka mereka terkeliru sampai memeluk agama Kristian pula?

Tengkarah ini juga menunjukkan buta sejarah dan buta budaya yang maha memalukan. Keaiban ini harus bertanggung oleh agamawan yang kononnya penyimpan obor ilmu dan hikmah dari tradisi agama.

Ingatkah pada waktu dahulu dalam era dakwah yang bergelonjak, banyak yang mempertegas nama Allah sudah ada disebut dalam Kitab Perjanjian Baru? Sibuklah yang mengatakan gerejawan zaman silam telah cuba melenyapkan nama Allah dari tulisan-tulisan keagamaan Kristian.

Kini terbalik pula. Bila penganut Kristian di Malaysia, yang kian luas menggunakan Bahasa Melayu/Malaysia, teristimewa golongan pribumi di Malaysia Timur, dalam upacara keagamaan mereka, ianya menjadi kegusaran yang sumbu apinya akan dibarakan oleh segelintir pelampau dan penjenayah agama.

Rupanya bukan saja Allah milik Melayu/Islam, juga Bahasa Melayu itu sendiri, kerana golongan kolot dan fundamentalis, gusar dan bantah kalau Perjanjian Baru dicetak dan disebar dalam Bahasa Melayu.

Jelas sekali, golongan ini buta sejarah dan buta realiti sosial. Prejudis dan keangkuhan mereka menebal kerana selama ini tiada yang mahu menegur dan menyangkal pendapat mereka, malah ianya dibiarkan bersemarak. Kata mereka: “Allah milik Islam. Bahasa Melayu milik Melayu dan sekaligus bahasa orang Islam.” Inilah kalut yang luarbiasa, malah mengaibkan sekali.

Di Indonesia, Bahasa Indonesia, yang lahir dari ibunya Bahasa Melayu, hari ini adalah bahasa bangsa nusantara yang majmuk itu. Perjanjian Baru dan nama Allah sudah sekian lama digunakan di sana. Kalau mahu dikatakan bahawa Islam di Indonesia itu rapuh dan cetek, maka orang yang menyebut itu sesungguhnya jahil lagikan tolol. Manakah pula pribumi Muslim Indonesia berduyun-duyun masuk Kristian dek kerana nama Allah telah digunakan oleh gereja dan dalam Perjanjian Baru?

Malah Bahasa Indonesia kini menampung jutaan pengguna wacana Kristian Indonesia, menjadikan bahasa tersebut antara salah satu bahasa utama dalam dunia Kristian masakini.

Di Semenanjung sendiri, bila golongan Peranakan Cina memeluk agama Kristian, mereka memerlukan Perjanjian Baru dalam Bahasa Melayu Baba untuk memahami dan menyampaikan agama yang mereka yakini itu. Malah, teks Perjanjian Baru mereka adanya yang ditulis dalam aksara jawi dan perkataan Tuhan Allah juga digunakan. Bolehkah kita membantah itu? Ataupun selama ini adakah orang Melayu (yakni nenek moyang kita terdahulu) telah membantah penggunaan tersebut?

Malah, kalau kita perhatikan bila mereka (termasuk Cina dan India lainnya) berbicara kepada orang Melayu, dan bila referensi Tuhan dibuat, mereka akan menyebutnya “Toan Alah” dan sama juga bila orang Melayu menyebutkannya kepada mereka. Adakah sekarang bermakna kita harus memantau dan menegah agar mereka tidak sebut lagi perkataan “Allah” (atau varian sebutan pelatnya) dan kita juga jangan menyebutkannya kepada mereka?

Di Asia Barat, bahasa Arab dan nama Allah telah sekian lama digunakan di gereja-gereja Kristian di Palestin, Syria, Lubnan, Jordan, Mesir, Irak dan Iran. Bayangkan sahaja kalau satu hari nanti, Arab Islam bertindak menyuruh Arab Kristian untuk menggugurkan nama Allah dari kitab suci dan wacana agama mereka, selain jangan menggunakan bahasa Arab untuk membicarakan dan menyampaikan ajaran Kristian.

Inilah yang selama ini tidak pernah tertanam dalam kesedaran sejarah, sosial dan teologis dalam pandangan keagamaan Melayu Malaysia yang telah dikarati dengan lapisan-lintang karut, kalut, angkuh, taksub, cetek, jahil, dan kebiadaban dan kerelaan melakukan

kekerasan dan paksaan atas nama agama. Bukanlah maksud kita untuk mencirikan ini sebagai kecenderungan keagamaan Melayu yang mutlak, kecuali menegaskan bahwa gejala-gejala ini semakin menebal dan dilemakan pula oleh keadaan semasa dan kepentingan kelompok tertentu.

Keprihatinan menjaga kehormatan dan nama baik pada ahli jemaah seagama tentunya perkara yang baik. Tapi jalan paksaan tidak harus dianjurkan. Tiada paksaan dalam agama memang sangat jelas, tetapi kita masih gusar dan tidak pasti kalau seseorang Melayu itu bertindak meninggalkan Islam atau menukar agama. Kes di Malaysia berkenaan murtad berpanjangan sehingga ada suara zalim yang mahukan hukuman mati pada murtad demi kesucian Islam. Termasuklah ada pula keghairahan berderu mengejar jenazah orang mati yang dipercayai seorang Muslim, walaupun keluarga dan warisnya tidak mengakui si mati itu seorang Muslim setahu mereka.

Ironis pula banyak saudara seIslam yang telah meninggal dunia, malah terlalu miskin untuk membiayai ongkos pengkebumian, jarang pula kita mendengar deruan usaha untuk mengkebumikan mereka ini. Inilah yang dikatakan salah rebut, sama biak dengan salah pimpin, salah faham dan salah bawa ilmu.

Inilah rebutan yang kecoh berlaku kini, dan kerja birokrasi agama, setelah dulu gila menangkap orang berkhalwat, mencari penganut ajaran sesat termasuk mencemuh dan mengutuk aliran Syiah dan 'aliran liberal', kini pula berjaga-jaga di kamar orang mati di hospital mencari jenazah mualaf untuk terus dikebumikan, walaupun dibantah oleh keluarga si mati dengan bukti dan rayuan mereka. Kes tarik menarik ke mahkamah berlanjutan, menambah kepiluan ahli keluarga yang baru kehilangan orang yang mereka sayangi. Kes seperti ini malah digeruni sendiri oleh mahkamah sivil dek takut dituduh campur tangan pada bidang kuasa mahkamah syariah. Akhirnya keluarga si mati terus dirundung kepahitan, dan kononnya demi menegakkan 'kebesaran Islam,' berakhir dengan harga amat tinggi iaitu menghalalkan segalanya walaupun tindakan tersebut melanggar norma-norma kemanusiaan.

Dalam keributan ini, ada kepimpinan menangguk di air yang keruh, manakala yang lain makin takut pula dengan suara-suara "pembela agama" atau "pembela Allah" yang galak suaranya dan seolah-olah sanggup sedia melakukan apa saja demi Allah.

Terjadilah dari rententan ini, kesanggupan untuk melakukan kekerasan dan tindak jenayah. Bayangkanlah kalau tindak kekerasan membakar gereja itu menyebabkan kematian dan pergaduhan besar yang berkesudahan dengan pertumpahan darah yang parah. Adakah cara ini semuanya dihalalkan dalam agama? Kita pula jadi takut oleh mereka yang sebenarnya tidak takut pada perintah Allah yang paling mendasar, yakni setiap segala yang bernyawa tidak boleh kita aniayai kerana membunuh satu nyawa seolah-olah membunuh seluruh umat manusia lainnya. Kesakralan nyawa manusia rupanya terlepas daripada fahaman penjenayah ini.

Ironisnya mereka melaungkan membela Allah. Inilah dabik dada paling angkuh. Allah Tuhan Yang Maha Besar tidak memerlukan kita membelaNya. Sebaliknya Allah memerintahkan kita membela manusia yang tertindas, terlemah dan terpinggir. Muslim di Malaysia sebagai golongan majoriti seharusnya melindungi golongan semua warga, termasuk minoriti agama dan etnik lain, dan itulah kerja keagamaan paling mulia.

Dalam fahaman agama kita, Allah melindungi semua umat manusia, dan mahu kita melindungi sesama antara manusia, khasnya yang lebih kuat dan mampu, ke atas mereka yang lemah dan memerlukan. Allah tidak pula meminta kita melindunginya. Siapa yang berkeyakinan itu, makanya jahil teramat akan fahaman berkenaan Tuhan dan KeTuhanan.

Tambah lagi, selalu kita ditakutkan-takutkan dengan ancaman neraka dan balasan Tuhan. Takutnya segala dan seantara. Tapi bila sanggup membakar gereja, bertindak seperti *gangster*, kejam dan menghina yang lemah dan kecil, mereka ini memperlihatkan keangkuhan dan kesombongan manusia yang tidak takut kepada Tuhan. Dalam wahyu di mana Tuhan sendiri mengakui kehadiran RahmatNya di mana jua tempat NamaNya disebut – yang bererti mana-mana jua rumah ibadat – makanya membakar atau memecahkan rumah ibadat adalah pemalingan agama yang paling tercemuh.

Bernangislah beberapa agamawan bila jemaahnya di ambang dosa dan kerosakan, tetapi tersenyap pula bila ada ahli jemaahnya sanggup merosakkan rumah ibadat penganut lain. Tangisan doa itu rupanya menjadi pentas hipokresi kerana takut akidah merosak tetapi tidak sama diberatkan dengan kerja jenayah yang merosak rumah ibadat dan kerukunan bermasyarakat. Kapan ini akan ditangisi bukanlah yang kita nanti dan harapkan, kecuali pemimpin agama seperti ini harus bertanggungjawab kerana membubuh bibit sengketa dan perbalahan setelah berapi bersyarah bahwa nama Allah adalah kesucian Islam semata-mata.

Hatta, jangan jadikan peristiwa ini sebagai suatu catatan sejarah yang hitam saja. Ianya harus menjadi tuntutan moral etika yang tiada pengecualian. Penegasan politik yang kuat mesti membanteras tindak penjenayah yang mencabuli hak asasi manusia dan keselamatan umum. Paling tidak, harus dapat kita pertegas dan iktiraf bahawa *menyebut Nama Allah adalah hak setiap manusia yang mempercayai-Nya dalam apa jua bentuk makna, bahasa dan tafsirannya*.

Yang merebut untuk membela Allah dan Islam rupanya tersasar angkuh sehingga tidak dapat bezakan antara Allah sebagai Pelindung dan semua Manusia yang terlindung oleh-Nya. Maka tugas bagi manusia yang beradab dan beragama ialah melindungi sesama manusia kerana itulah perintah-Nya selaku Pelindung segala-galanya.

Yang tidak takut Allah rupanya mereka ini yang sanggup melakukan segala bentuk kekerasan dan paksaan, sedangkan takut mereka kepada Allah tinggal pada hal-hal ritual, dan perkara remeh yang sebenarnya tidak pernah meng^{ruh} dalam kehidupan beragama kita. Inilah yang *sebenarnya* harus kita takuti.

**12 Januari 2010
Kopenhagen, Denmark**